

DARI SEBULAN KE SEBULAN

Cik Khadijah Sidek Yang Dipertua Kaum Ibu Semalaya di dalam ucapannya baharu-baharu ini di Singapura dikatakan telah berkata bahawa kita janganlah takut kepada sesiapa pun melainkan Allah. Ucapan ini sesungguhnya sangat menarik kerana kalau ia akan dapat menguatkan apa yang dikatakannya itu sudah tentulah ia akan tunduk kepada Allah kerana Allah itu sahaja yang ditakutinya. Bagi seorang yang takut kepada Allah itu bermaknalah ia akan patuh dan taat kepada perintah-perintah Allah dan kerana itu kita berharap Cik Khadijah sendiri akan patuh dengan perintah-perintah itu- iaitu berusaha dan bekerja kerana menegakkan kalimah Allah di negeri ini. Maksudnya kita berharap supaya ia akan berjuang di lapangan agama untuk menegakkan cita-cita Islam. Di sebalik itu kita berharap ia akan berani berkata benar di hadapan sesiapa pun dan berani dengan tegas menegur pemimpin-pemimpin yang seperjuangan dengannya yang tatkala di hadapan orang-orang Islam berbuat sebagai orang Islam tetapi kemudian mereka melanggar dan mencabar dengan kelakuan-kelakuan mereka akan hukum yang ditentukan oleh Tuhan. Kita berharap Cik Khadijah Sidek jika sebenarnya takut kepada Tuhan ia akan bekerja menjadi tentera Allah untuk menegakkan dan mengasuh supaya umat menjadi hamba-hamba Allah yang taat kepada perintah-perintah-Nya.

* * *

Sedikit masa yang lalu Tengku Abdul Rahman dikatakan telah menegur pengarang akhbar-Malaya Merdeka. Sama ada teguran itu terbit dengan sifatnya sebagai Yang di-Pertua UMNO, Yang Dipertua Perikatan atau pun sebagai sifatnya Menteri Pertahanan Dalam Negeri maka

teguran itu ditujukan kepada anak buahnya sendiri. Salah sekali pandangan sebahagian orang yang menyatakan bahawa teguran itu adalah melanggar kebebasan seseorang wartawan. "Malaya Merdeka" sememangnya adalah suara dari UMNO dengan Perikatannya dan walau bagaimanapun kerajaan yang ada sekarang adalah kerajaan Perikatan yang disokong dan didirikan oleh Malaya Merdeka. Malaya Merdeka dengan sendirinya adalah menjadi suara parti dan dengan kerana ia bukan sebagai surat khabar bebas dan wartawannya yang menjalankannya pula mestilah tunduk kepada aturan yang ditentukan baginya- ia tidak menjadi wartawan bebas. Dengan itu maka tak dapat tiada teguran itu adalah teguran yang berlaku di antara isi rumah Tengku itu sendiri yang orang lain tidak boleh campur dalamnya.

* * *

Persatuan Wartawan Persekutuan Tanah Melayu dan juga kemudiannya Persatuan Wartawan di Singapura telah menegur langkah Tengku itu dan mereka memandang sebagai satu perbuatan yang mengganggu pekerjaan seorang wartawan dan akhbaranya. Tatkala mengulas bantahan-bantahan itu Tuan Sinikas penulis khas *Straits Times* mengatakan mengapakah dalam perkara ini patut seorang wartawan tidak melakukan ketertibannya hingga menyentuh bagi pihak sebuah akhbar suara parti siasah? Patutkah wartawan-wartawan Melayu menuduh Tengku cuba menutup mulut mereka sekiranya didapati mustahak membantah Malaya Merdeka menyerang pendirian UMNO terhadap masalah rupa bangsa? Saya, katanya, tidak ingat adakah tuan-tuan itu adil mengeluarkan

suara mereka apabila akhbar Melayu dibakar di Johor dahulu dan apabila penjual-penjual akhbar yang menjual akhbar-akhbar Melayu yang tidak disukai oleh UMNO itu diugut? Bagi kita yang demikian ini “Tidak ada komen”.

* * *

Baharu-baharu ini telah singgah seramai 13 orang ahli-ahli rombongan yang terdiri dari pertubuhan-pertubuhan Islam Indonesia daripada lawatan mereka ke negeri China dengan jemputan Persekutuan Islam di Peking. Rombongan itu telah singgah di Singapura dan berada di sini selama 3 malam kerana menunggu kapal terbang yang membawanya dari Karachi menuju ke Jakarta. Salah seorang daripada anggota rombongan itu, saudara Taha Mahmud, telah memberi kenyataan kepada akhbar Melayu tempatan dengan mengatakan bahawa ia dahulunya menyangka bahawa saudara-saudaranya kaum Muslimin di negeri China itu menderita tetapi sekarang sebaliknya. Apabila pendapat itu dibentangkan kepada ketua rombongan maka mereka itu sangat kesalkan tentang kenyataan yang diberi oleh seorang ahli rombongan itu. Kerana mereka tiba di sana segala-galanya diatur dan mereka tidak diberi peluang melihat apa yang dihajat oleh mereka hendak melihatnya sedangkan bercakap dengan orang-orang yang dijumpai atau yang ada di dalam jamuan-jamuan itu pun dikawal dengan keras dan mereka dicemburui apabila berkata-kata di dalam bahasa Arab. Beliau mengatakan juga di dalam satu jamuan besar yang juga dihadiri oleh alim ulama pertama kali menghadiri satu jamuan di rumah orang besar-besarnya. Yang demikian itu dapat dilihat daripada gerak dan mata mereka itu. Apabila seorang berdua ahli rombongan cuba mencari-cari bercakap dengan mereka maka dengan segera juru bahasa datang rapat kepada mereka. Kalau menentukan sesuatu itu terbalik daripada yang ada itu tentulah, mendatangkan pula, satu pertanyaan bagaimakah kita mengetahui keadaan mereka sebalik daripada

dahulu kerana dahulu juga kita tidak melihatnya?

* * *

Di dalam Urumqi, yang dilawati oleh rombongan itu, ada suatu perkara yang patut mendapat perhatian orang-orang kita di sini. Urumqi ialah sebuah tempat yang penduduknya terdiri daripada hampir-hampir 90% daripada orang-orang Islam dan kerana itulah, sesudah menjalankan langkah-langkah keras, segala percubaan yang dilakukan mendapat tentangan yang kuat. Kerajaan Peking lalu mengubah langkahnya mengadakan cara yang lembut dengan mengambil hati orang-orang Islam memperbaiki masjid, mengatur sekolah-sekolah untuk orang Islam sedang sedang pelajaran di sekolah itu disusun sebegini rupa sehingga harus menjadikan cara-cara hidup pemuda-pemuda nanti tidak lagi cara hidup orang Islam tetapi dengan cara hidup orang-orang komunis. Pelajaran-pelajaran agama hanya diberi di rumah-rumah seperti mengajar membaca al-Quran dengan keadaan yang sangat tidak memuaskan. Pelajarannya kolot seperti keadaan di Indonesia pada masa 50 tahun dahulu. Anak-anak pagi-pagi hari lagi dibiasakan menyanyi memuja-muja Mao Zedong, demikian pula kalau musim padi mereka selalu bersyukur atas Mao Zedong kerana ialah yang menjauhkan mereka daripada kelaparan. Huruf-huruf tulisan yang ada pada mereka ialah menggunakan huruf Arab seperti Jawi kita di sini. Bagaimana sebenar-benarnya kehidupan mereka di sana adalah menjadi soal yang sulit bagi kita hendak menjawabnya.

* * *

Baharu-baharu ini sebuah pertubuhan siasah Islam telah hidup atau tumbuh di Singapura dengan nama “Ansar al-Islam”. Pemimpinnya telah dipilih ialah Tuan Sayyid Ahmad Dahlan yang terkenal di dalam lingkungan orang Islam di sini. Terbit pertubuhan ini sepanjang

yang diberitakan, ialah apabila mereka itu gagal daripada menghendaki pertubuhan persaudaraan Islam yang dianjurkan oleh Tuan Syed Ali al-Attas tidak mahu menjadikannya badan politik dan kerana itulah, khabarnya, orang-orang yang mahu berpolitik menubuhkan Ansar al-Islam itu. Bagi kita, Alhamdulillah, berasa syukur ada satu cita-cita dijalankan untuk memperjuangkan politik Islam di Singapura tetapi hanya satu perkara yang menjadi kemesyikan sebahagian orang ramai tentang caranya Ansar al-Islam itu ditubuhkan. Tatkala menubuhkannya tidak ada dipanggil permesyuaratan M-A dikatakan telah disusun begitu rupa dan kemudian dijemput beberapa orang lagi lalu mengambil keputusan mengesahkan undang-undangnya dan melantik ahli jawatan kuasanya. Dengan lantikan itu terikatlah satu pengakuan bahawa anggota-anggota jawatan kuasanya itu yang telah dilantik berhak duduk selama tiga tahun bagi pilihan itu.

Kemesyikan itu akan bertambah. Yang pertama: Tidak dipanggil mesyuarat am dan beberapa banyak orang-orang Islam yang terkemuka dan yang boleh dikemukakan, dan yang kedua mengapa lantikan itu untuk tiga tahun. Kita berharap mudah-mudahan kemesyikan ini akan mendapat keterangan-keterangan yang jitu kerana walau bagaimanapun dengan sifatnya sebuah pertubuhan Islam orang-orang Islam berhak mengetahui ke mana mereka dibawa dan untuk apa dipimpin.

* * *

Persekutuan Seruan Islam Semalaya telah mengadakan mesyuarat agung pada 2 Jun yang lalu. Di dalam mesyuarat agung ini keadaan berlainan daripada tahun-tahun yang lalu disebabkan nampaknya perjalanan pentadbiran Jamiah pada tahun 1955 dahulu tidak lancar-tidak cukup teratur. Umpamanya perkara pemuda Jamiah. Ia dikatakan telah diterima pada dasarnya dan satu jawatan kuasa kecil mengandungi 9 orang sudah lantik untuk mengkaji undang-undang Jamiah

itu tetapi setahun berjalan tidak satu mesyuarat pun yang dapat dijalankan oleh mereka dan sekurang-kurangnya sebahagian daripada orang itu menghendaki supaya pemuda itu masuk sahaja ke dalam Persekutuan Pemuda Islam kerana setiausaha Jamiah itu adalah Yang Dipertua bagi Persekutuan Pemuda Islam. Selain daripada itu perkara yang tidak menyenangkan orang ramai ialah penyata kira-kira yang dibentangkan di dalam mesyuarat agung itu dikatakan lebih dahulu tidak ditatap oleh jawatankuasanya. Tatkala dibantah maka disetujui bahawa kira-kira itu ialah dari satu Julai 1955 sampai 31 Disember 1955. Kerana keputusan itu maka timbulah pertanyaan-pertanyaan: Bagaimana kira-kira di antara satu Januari sampai 30 Jun 1955. Hal yang mengatakan sebab-sebabnya kejadian itu tidak pula dinyatakan di dalam penyata tahunan yang dibentangkan kepada anggota-anggota Jamiah di dalam mesyuarat agung itu.

Yang lebih tidak menyenangkan orang-orang awam dikatakan ialah tentang beberapa banyak orang telah mengetahui atau memasukkan borang bersekutu bersama-sama dengan wangnya tidak mendapat resit dan tidak pula mengetahui adakah dirinya diterima menjadi ahli atau tidak. Kalau diterima menjadi ahli sudah tentu mendapat resit dan kalau tidak diterima ke mana pergi wang yang telah dihantar itu. Inilah yang menjadi kemesyikan, kemesyikan mana mustahak diperhati dan diselidiki oleh anggota-anggota jawatankuasa Jamiah supaya keadaan yang buruk itu dapat diperbaiki dan supaya Jamiah dapat lancar menjalankan kerja-kerjanya untuk faedah umum.

* * *

Ada pula satu perkara yang telah menjadi berita dalam akhbar tempatan tentang pertentangan hebat di antara setiausaha Jamiah, Encik Wan Jur dan Edrus. Menurut punca-punca yang mengetahui sebenarnya ada kejadian begitu tetapi di dalam

suatu permesyuaratan tentulah berlaku pertentangan-pertentangan apabila pendapat-pendapat berselisih dengan keadaan. Kita percaya pertentangan itu hanya untuk maslahat umum dan sebagai lazimnya kedua-dua orang itu dikatakan selalu bertentang, sehabis mesyuarat mereka duduk bersama-sama berbual seperti biasa. Yang menjadi pertentangan mereka ialah dasar dan cara kerja yang dipandang mereka tidak sesuai untuk kebajikan masyarakat.

* * *

Encik Wan Jur Abu Bakar Setiausaha Jamiah telah menunaikan fardhu dengan kapal Anking yang akhir pada 21 Jun 1956. Kerana mengenang jasa-jasanya kepada Jamiah satu jamuan makan telah diadakan oleh anggota-anggota Jamiah. Di dalam jamuan makan itu sudah tentu ada ucapan-ucapan, di antara ucapan-ucapan itu Cik Ahmad bin Muhammad Ibrahim seorang pengadil mahkamah tempatan Singapura dan seorang Islam yang terkemuka dan sebagai seorang sahabat kepada Encik Wan Jur telah memberi ucapan-ucapan yang menggalakan serta meriwayatkan tentang bagaimana mulanya Jamiah itu didirikan. Di antara lain-lain ia dikatakan menyatakan bahawa Jamiah itu ialah Maulana Abdul Alim al-Siddiqi telah mempercayakan segala segala kerja itu dijalankan hanya menerusi Encik Wan Jur itulah. Encik Ahmad Ibrahim menyatakan sungguhpun harus ada orang-orang yang boleh mentadbirkan Jamiah itu lebih maju tetapi hanya Encik Wan Jur seoranglah yang boleh dapat menjalankan kerja-kerja Jamiah itu mengikut maksud dan tujuan Maulana sebab itulah jawatan Setiausaha Jamiah itu tidak akan sempurna kalau dijawat oleh orang lain untuk menjalankan rencana Maulana. Adakah pendapat ini benar atau tidak terpulang kepada orang ramai khususnya orang-orang Islam yang ada di Singapura ini. Mereka melihat sendiri bagaimana kerja-kerja yang sudah dijalankan oleh Jamiah menghadapi masyarakat sekarang.

Kalau ditatap penyata-penyata tahunannya maka nama Jamiah dengan kerja-kerjanya adalah tidak sesuai-banyak kerja-kerja yang tertinggal dan sebab-sebabnya tentulah tidak lain disebabkan oleh kerana perjalananya tidak lancar dan sudah lazim kalau perjalanan satu-satu pertubuhan tidak lancar puncanya ialah kepada Setiausaha pertubuhan itu sendiri dengan kerana itu orang bertanya apakah kerana kawan dan kawan? Kita hanya memulangkan kepada pendapat orang ramai.

* * *

Tuan David Marshall pada 6 Jun yang lalu telah meletakkan jawatannya sebagai Ketua Menteri Singapura. Sebab-sebabnya umum tentulah mengetahui tidak lain kerana beliau sudah terlampau membuat janji-janji dan kerana ikatan janji-janji itu tak dapat ditunaikan maka sudah pada tempatnya, beliau meletakkan jawatannya dan memberi peluang kepada orang lain menjalankan tugas-tugasnya untuk faedah masyarakat. Langkah ini patut dipuji. Seorang teman di Persekutuan Tanah Melayu telah menulis kepada kita menyatakan bahawa itu satu langkah yang patut dipuji tetapi bagaimanakah kedudukan kerajaan persekutuan yang dikatakannya telah setahun memegang tugas tidak jaya dalam tiap-tiap langkahnya? Ini terpulang kepada orang-orang di *federation* sendiri-kalau mereka berfikir sudah tidak mempunyai kesanggupan lebih baik beri peluang kepada orang lain-habis perkara.

* * *

Daripada riak-riak yang ada sekarang, terutamanya daripada ucapan-ucapan yang dikeluarkan oleh Pegawai Penerangan UMNO sendiri, nampak jelas bahawa ada keretakan di dalam pimpinan UMNO di Persekutuan Tanah Melayu. Tuan Syed Jaafar al-Bar selalu mengatakan bahawa gerak-gerak dari dalam itu lebih hebat daripada ancaman-ancaman dari luar dan oleh kerana itulah pemimpin-pemimpin mesti tegas menjalankan tugasnya dan kalau tidak, kita mengusulkan, gunakan langkah-langkah

Dari Sebulan Ke Sebulan

-sambungan dari muka 6

Yang dahulu, ketepikan mereka itu ganti dengan orang lain.

Dapatkan ini dijalankan dan akan menguatkan kepada kedudukan UMNO – tidakkah ia menjadi satu soal yang kecil yang tidak patut dikaji masak-masak oleh pucuk pimpinan UMNO.

* * * *

Profesor Abdul Qahar Mudhakkar Rektor dari Universiti Islam Indonesia di Jogya telah melawat Persekutuan Tanah Melayu. Di Singapura sempat beliau memberi ceramahnya yang diadakan oleh Ikhwān (kemudian ceramah itu dicetak dan dijual kepada umum dengan harga 60 sen senaskhah tambah 10 sen untuk setem jadi 70 sen sedangkan kepada anggota Ikhwān hanya diminta hantarkan 20 sen (untuk setem sahaja-P).

Di dalam ucapannya beliau mengingatkan bahawa pengajaran-pengajaran Islam itu kalau dipegang sekerat-sekerat sudah tentu akan membinasakan kedudukan Islam. Beliau menganjurkan supaya hendaklah tegas langkah-langkah yang diambil untuk menjalankan cita-cita Islam – jangan sekerat-sekerat sahaja.

Peringatan beliau ini mengingatkan kita kepada apa yang telah berlaku dan dilakukan oleh orang-orang Islam di negeri ini. Baik ulamanya atau orang-orang yang berpelajaran agama selalunya berperasaan “kena mata dipicingkan, kena perut dikempiskan” – Tidak berani tegas menunjukkan pemimpin-pemimpinnya yang menjalankan agamanya sekerat-sekerat. Kerana di hadapan umum, dipendengaran umum sekarang tidak asing lagi terdengar kalau pemimpin-pemimpin yang beragama Islam yang di dalam undang-undang pertubuhannya bercita-cita “meninggikan agama Islam” itu sendirinya keluar daripada masjid berdoa di hadapan ramai meminta dan kemudian terus sahaja keluar ke tempat-tempat *dancing* ke tempat-tempat ronggeng dan segala-galanya. Ini adakah termasuk daripada sekerat-sekerat

atau bagaimana? Mudah-mudahan ustaz-ustaz yang fasih berbicara dan bercakap Arab dapat memerhatikan hal ini. Perbaikilah lingkungan saudara sebelum saudara menjalankan tugas menyeru orang lain.

* * * *

Profesor Abdul Qahar Mudhakkar tatkala singgah

di Singapura telah menyampaikan salam Tuan Sayyid Jaafar al-Bar kepada sahabatnya ‘Idrūs tuan punya dan pemimpin majalah Qalam. Selamanya itu bersambung dengan mengatakan kerana Profesor Abdul Qahar Mudhakkar sahabat kepada Edrus ia meminta supaya profesor itu menasihatkan Edrus berhenti mengkritik. Hal ini tentulah memberi kesan bahawa rupanya sesudah Qalam dan Warta dulu difitnahkan di hadapan umum dan kemudian terbit daripada fitnah itu kerana kritik-kritiknya, digalakkan supaya dibakar, kemudian sesudah dibakar diboikot dan seterusnya dengan langkah-langkah yang hebat tetapi Qalam dan Warta di bawah pimpinan Edrus tetap mengkritik tetapi memberi ingat kepada umat dan segala langkah-langkah itu tidak mampan dan Alhamdulillah dengan taufiq dan hidayah Tuhan, Qalam masih hidup dan meneruskan tugasnya memberi ingat kepada umat Islam. Dan kerana tidak mampan itulah rupanya saudara al-Bar meminta menyampaikan pesan kepada seorang luar menasihati kepada Edrus. Orang tentu bertanya kenapa al-Bar tidak mau berjumpa sendiri dengan Edrus supaya bercakap dengan baik dan dengan cara persahabatan? Tidakkah dahulu kedua-dua mereka bersahabat? Di dalam perkara ini orang ramai terutamanya orang-orang di *federation* dan di utara Tanah Melayu dapat memerhati dan mengukur sendiri. Di dalam apa-apa hal pun pendirian Qalam tetap mengkritik kepada perkara-perkara yang dipandangnya berlawanan dengan dasar dan cita-cita Islam sepenuhnya – tidak sekerat-sekerat seperti yang dikatakan oleh Profesor Abdul Qahar itu.